

दिनांक 24.12.2024

समय: 18.45 बजे

आकाशवाणी जयपुर—अजमेर

प्रादेशिक समाचार

- प्रधानमंत्री नरेंद्र मोदी नई दिल्ली मांय अर्थशास्त्रियां सागे बजट ऊं पैली री चर्चा कीनी।
- मुख्यमंत्री भजन लाल शर्मा विपख माथे वां रो काम सही तरीका ऊं नी करण रो आरोप माण्ड्यो।
- उपभोक्ता जागरूकता ने बधावो देवण सारु सरकार केई नुवा जतन कीना।
- प्रभु यीशू मसीह रो जन्मदिन क्रिसमस काल मणायो जावेला— आज आधी रात ऊं खास प्रार्थना सभावां व्हेला।

000

प्रधानमंत्री नरेन्द्र मोदी आज नीति आयोग मांय अर्थशास्त्र रा आलां जाणकारां सागे बजट ऊं पैली री चर्चा कीनी। मीटिंग मांय वित्तमंत्री निर्मला सीतारमन, नीति आयोग रा मुख्य कार्यकारी अध्यक्ष बी.वी.आर. सुब्रमण्यम अर दूजा आला अहलकार ई सिरकत कीनी। माली साल 2025—26 रो बजट बणावण सारु बजट ऊं पैली री चर्चा री सरुआत ई महीना री 6 तारीख ने व्ही ही। ई रा तैत केंद्रीय वित्त मंत्री न्यारा—न्यारा राज्यां रा वित्त मंत्रियां, किसान संघां रा नुमाइन्दां, अर्थशास्त्रियां अर एम.एस.एम.ई. कारोबारियां सागे चर्चा कीनी ही। वित्त मंत्री रो एक फरवरी ने लोकसभा मांय माली साल 2025—26 रो बजट पेश करण रो कार्यक्रम है।

000

मुख्यमंत्री भजन लाल शर्मा विपख माथे वां रो काम सही तरीका ऊं नी करण रो आरोप माण्ड्यो है। वे आज प्रदेश भाजपा मुख्यालय मांय खबरनवीसां सागे बातचीत कर रह्या हा। श्री शर्मा कह्यो के भाजपा सरकार अन्त्योदय री भावना ऊं काम कर रही है। वे कह्यो के प्रधानमंत्री नरेन्द्र मोदी साल 2014 ऊं आखिरी छोर माथे बैठ्या लोगां ने आगे लावण सारू काम कर रह्या है।

.....

इण ऊं पैली मुख्यमंत्री नई दिल्ली मांय न्यारा—न्यारा केन्द्रीय मंत्रियां सागे ई मुलाकात कीनी। वे गृह अर सहकारिता मंत्री अमित शाह अर उद्योग मंत्री पीयूष गोयल सागे भेंट कर र राज्य री विकास परियोजनावां अर उद्योग रा हलका मांय निवेश री संभावनावां रा बारा मांय चर्चा कीनी। श्री शर्मा मध्यप्रदेश रा मुख्यमंत्री डॉ. मोहन यादव सागे ई जोधपुर हाउस मांय मुलाकात कीनी। ई दौरान वे दोन्यू राज्यां बीचे चाल रह्या विकास रा कामां अर आपसी मदद रा बारा मांय बातचीत कीनी।

000

प्रदेश मांय चलाया जा रह्या सुशासन सप्ताह रा तहत आज ग्राम पंचायतां मांय खास शिविर लगायी ज्या। बालोतरा जिला री रेवाली, सिंगोडिया, बाटाडू, हीरा की ढाणी अर जाखडा ग्राम पंचायतां अर गिडा ब्लॉक री ग्राम पंचायत मांय अ शिविर लगायी ज्या। शाहपुरा जिला रा आशान्वित ब्लॉक कोटड़ी मांय रू—ब—रू अभियान सरू करी ज्यो। ई रा तैत ज्या बस्तियां मांय विकास नी व्हे सक्यो है वां री ठा कर र वठे विकास रा काम करावण सारू नुवी मंजूरियां दी जावेला। ई सागे ई चौपाल लगा र तालीम, स्वास्थ्य अर दूजा संकेतकां ऊं जुड़्या काम ई कर्या जावेला।

000

भीलवाड़ा जिला रा माण्डलगढ़ मांय विधायक गोपाल लाल खण्डेलवाल आज शहरी आयुष्मान आरोग्य मन्दिर जनता ने सूंप्यो। इण ऊं आरे—सारे रा लोगां ने स्वास्थ्य ऊं जुड़्या सुबीता, मुफ्त दवाइयां अर जांच रो फायदो तुरत मिल सकेला। दूजी कानी शाहपुरा जिला रा कोठियां रा सरकारी प्राथमिक स्वास्थ्य केन्द्र मांय आज मुख्यमंत्री आयुष्मान आरोग्य शिविर लगायी ज्यो। ई मौके लोगां ने आयुर्वेदिक काढो ई पायी ज्यो। झुन्झुनू मांय मुख्यमंत्री आयुष्मान आरोग्य योजना

रो फायदो एक जोड़ा ने ई मिल्यो। सीएमएचओ डॉ. छोटेलाल गुर्जर बतायो के ई जोड़ा री जुड़वां बेटियां रो दो लाख रूप्या ऊं बत्ता खर्च रो ईलाज ई योजना रा तैत अस्पताल मांय मुफ्त करी ज्यो।

आं बेटियां रा बाप मोनू प्रकाश ई सारू राज्य सरकार रो धन्यवाद कीनो।

000

राष्ट्रीय उपभोक्ता दिवस रे मौके केंद्रीय उपभोक्ता कार्य मंत्री प्रल्हाद जोशी आज वर्चुअल तरीका ऊं केई नुवी पहल री सरूआत कीनी। आं रो मकसद ई-कॉमर्स प्लेटफॉर्म परां डार्क पैटर्न री पिछाण कर र ग्राहकां ने मजबूत बणावणो है। श्री जोशी ई सारू **जागो ग्राहक जागो एप, जागृति एप अर जागृति डैशबोर्ड** री सरूआत कीनी। **‘जागो ग्राहक जागो एप’** ग्राहकां ने न्यारा-न्यारा यूआरएल रा बारा मांय ज़रूरी ई-कॉमर्स री जाणकारी देवेला अर असुरक्षित यूआरएल ऊं सावचेत करेला। ग्राहक किण री भात री शिकायत अर मदद सारू सत्रह भाषावां मांय मुहैया करायी ज्यो राष्ट्रीय हेल्पलाईन नम्बर **1915 (उन्नीस पन्द्रह)** माथे सम्पर्क कर सके है। प्रदेश मांय ई राष्ट्रीय उपभोक्ता दिवस रे मौके न्यारा-न्यारा कार्यक्रम राख्यी ज्यो। राज्य स्तर रो जळसो जयपुर मांय राख्यी ज्यो जिण मांय मंत्री सुमित गोदारा राज्य अर जिला उपभोक्ता आयोगां मांय मध्यस्थता व्यवस्था री सरूआत कीनी। कार्यक्रम मांय ग्राहकां ने न्याय दिरावण सारू वर्चुअल तरीका ऊं सुणवाई रा बारा मांय ई चर्चा करी ज्यी। जळसा मांय हाईकोर्ट रा जस्टिस इन्द्रजीत सिंह अर राज्य उपभोक्ता आयोग रा अध्यक्ष न्यायमूर्ति देवेन्द्र कच्छावा ई सिरकत कीनी। बालोतरा मांय उपभोक्ता जागरूकता प्रदर्शनी लगायी ज्यी। पाली मांय उपभोक्ता जागरूकता सप्ताह रा तैत संगोष्ठी राख्यी ज्यी। शाहपुरा, डीग, भरतपुर, झुन्झुनू अर डूंगरपुर समेत केई ठौड़ां ग्राहकां ने वां रा हक रा बारा मांय जाणकारी देवण सारू कार्यक्रम राख्यी ज्यो।

000

सुपोषित मां-अभियान रो तीजो दौर 27 दिसम्बर ऊं सरू व्हेला। ई सारू हाल ताई एक हजार ऊं बत्ती पात्र महिलावां री पिछाण करी जा चुकी है। आं ने मुफ्त पोषण किट मुहैया कर्या जावेला। लोकसभा

अध्यक्ष ओम बिरला री पहल परां साल 2020 मांय कोटा ऊं इण री सरूआत करी ज्यी ही।

कोटा—बूंदी संसदीय हलका री आस वाळी पांच हजार महिलावां री स्वास्थ्य सुरक्षा रो लक्ष्य ले र सरू करी ज्यो ओ अभियान लारला पांच साल मांय 15 हजार महिलावां तांई पूग ग्यो।

000

प्रभु यीशु मसीह रो जन्म दिन काल किसमस रा तौर ऊं मनायो जावेला। पेश है एक रपट—

.....

सवाईमाधोपुर जिला मांय ई किसमस रो उमाव निजर आ रह्यो है।

000

पद्मभूषण अर दादा साहेब फाल्के पुरस्कार ऊं नवाजी ज्या फिल्म निर्देशक श्याम बेनेगल देवलोक व्हे गया है। 90 साल रा बेनेगल लम्बा बगत ऊं मांदा हा। श्याम बेनेगल राजस्थान ऊं जुड़ी फिल्मां बनायी। पेश है एक रपट—

.....

000